




Sabtu, 19 Juni 2021
Ogen: Kejadin 9: 8-17



Bentha Tanda Perpadanan



(Iendeken): *"Seperti pelangi sehabis hujan, itulah janji setiaMu Tuhan. Di balik dukaku telah menanti harta yang tak ternilai dan abadi"*. Syair ende-enden enda adi si endeken

mpeturah pengarapenta nggeluh guna tetap erpengendes man Tuhan i bas ndalani kiniseran. Lit nge si mehulina si ibahan Tuhan, kalimat si bagenda erbanca ukurta la ngelabuh amin gia situasi mungkin lenga sue bagi ukurta.

Pelangi/benteha pernah ijadikan Dibata jadi tanda perpadanen, tanda kesetianNa man manusia asum zaman Nuah (ayat 17). Kenca idalanken Nuah alu patuh perintah Dibata, erbahan sada kapal, mpebengket keluargana bagepe sepasang rubia-rubia, maka kerina si i bas kapal e iselamatkan Dibata arah banjir si mbelin. Perpadanen si isehken Dibata man Nuah berlaku man kerina manusia i doni enda, nina Tuhan: Ndigan pe lanai Kucedaken kasa kai si nggeluh alu banjir si mbelin; ndigan pe doni enda lanai icedaken alu banjir (ay.11). Arah sekalak si patuh banci enterem kalak iselamatkan. Si mehulina min tetap lit kalak si patuh man perintah Tuhan tiap zamanna gelah perpadanen Dibata tetap tangkas teridah guna mpekena-kena doni enda dengen lanai erbahan banjir si mbelin.

Jaman genduari enda adina si idah benteha, mari si inget dengen si gejakpen maka Dibata tetap setia nandangi kalak si tek man baNa. Lanai bo si ukuri bahwa benteha sada pembiasen cahaya kenca udan, tapi nggo lebih ku teologisna kita rukur gelah reh semangatna nggeluh. Bahwa kalak si saber, setia dengen patuh pasti iselamatkan Tuhan.

Jadilah nuah-nuah si patuh i bas zaman genduari enda, alu bage perpadanen Dibata e tetap kita i bas kegeluhenta. Tep-tep jelma lit perpadanen Dibata man bana, jadi kai ia , uga kegeluhenna kerina nggo lit tak-takna i bas tan Tuhan emaka tetaplah megegeh langa keru keleng ate Tuhan man banta.

Ada pelangi sehabis hujan, keleng ate Tuhan tetap maler bas geluhenta